

Minister de Meza na firmamento di proyecto

E luga di Carnival Village ta safe, mas grandi y bon situa



ORANJESTAD(AAN):

Prensa tabata testigo di momento cu Gobierno hunto cu Fondo Desaroyo Aruba y e contratista ganado di destaho publico, esta Arubaanse Wegenbouw Maatschappij a firma e Acuerdo di Ehecucion pa construccion di e proyecto Carnival Village na San Nicolas. Tambe nan a tende directamente for di Minister de Meza un di e motornan tras di e proyecto, confirmacion di con den varios aspecto e facilidad aki ta beneficia comunidad di Aruba en general y San Nicolas en particular.

Na prome luga a confirma cu construccion den su prome fase cu ta suficiente pa tene e evento di Cais & Soca Monarch, ya a cuminsa y ta cla pa dia 16 di januari 2014. "Nos a mira trabounan cu Arubaanse Wegenbouw Maatschappij a haci cu ta sumamente bon, di calidad hopi halto y na tempo," Minister de Meza a bisa. Inmediatamente despues di e temporada di Carnaval, lo continua cu e di dos fase. E trabou ta bay ta hopi bunita cu nos tur por ta hopi orguyoso di dje. E minister a indica cu hopi a papia di dje. "Awe nos ta hopi contento cu e proyecto aki a inicia den Gabinete Mike Eman I". Pa loke ta trata e supuesto contaminacion cu por existi riba e tereno, Minister de Meza a dedica importancia na e argumento ey indicando cu e tereno tin mas cu 40 aña bashi y pa hopi tempo a sirbi como un lumber yard. Adicionalmente a haci varios investigacion riba dje paso ta for di hopi tempo caba kier a duna bek na Aruba. E mandatario a bisa di manera hopi cla: "E

no ta contamina. Mi ta kere esaki ta actonan di nos contrincantenan politico cu si bo wak den nan propio plannan, nan tambe tabatin uso p'e."


Otro aspecto cu a tene cuenta cune ta esun di parkeo. Den e plannan di Carnival Village, arkitectonan a asigna un bon parti na esaki. Ta bay tin un cantidad adecua di parkeo su dilanti. Adicionalmente e compleho recreacional aki ta ubica den un area hopi central cu varios scol rond di dje

ademas di otro parkeo den cercania cu ta suplementa e capacidad ey, similar na loke semper a haci rond di Joe Laveist Sport Park. Fuera di ofrece un luga adecua y digno pa resalta e eventonan mas grandi di Carnaval den

dje, Carnival Village tambe lo ofrece un luga di movimiento, recreacion y encuentro pa henter comunidad di San Nicolas y Aruba. Un bes cla, e proyecto aki ta uni su mesa na e lista cada bes mas largo di luganan cu San Nicolas ta

hayando pa bira otro destino turistico riba nos isla, mescos cu Oranjestad y Noord. Minister Mike de Meza y Gabinete Mike Eman ta satisfecho cu e cambionan cu ta tumando luga pariba di brug.

"Carnival Village ta algo sumamente grandi pa San Nicolas"



ORANJESTAD(AAN): E Meza a bisa prensa con e ta titular di Finanzas y Telecomunicacion, como bon yiu di San Nicolas, no por a disimula su entusiasmo y satisfaccion cu firmamento di Acuerdo di Ehecucion pa construccion di Carnival Village. Na ocasion comparti cu Prome Minister Mike Eman, representante-nan di Fondo Desaroyo Aruba y Arubaanse Wegenbouw Maatschappij, Minister de

Meza a bisa prensa con e ta sinti cu esaki ta "algo sumamente grandi pa San Nicolas cu nos tur por ta hopi orguyoso di dje." E mandatario a splica cu e facilidad nobo, fuera di e temporada di Carnaval, por wordo uza durante henter aña pa tur tipo di actuacion cultural, actividad social y deportivo. Ademá di espacio habri, ta inclui den e plannan un cancha di basketball y un ruta special

pa esnan cu ta haci skateboarding. Tambe ta bay tin partinan pa muchanan mas chikito por ta den movicion. Esaki ta posibel como cu e tereno ta hopi grandi, mas cu e veld di Joe Laveist Sport Park cu te awor tabata centro di eventonan manera Calypso, entre otro. Hustamente e proteccion di e

inversion y propiedad di pueblo den e compleho deportivo, ta un di e motibonan pakico a crea Carnival Village. E tereno y otro facilidadnan deportivo no por wordo uza mas pa actividad den futuro. Joe Laveist Sport Park ta bay haya cancha di futbol y veld di baseball di yerba riba standard internacio-

nal y mester preveni daño. Aki tambe Gobierno ta haciendo trabounan grandi pa brinda pueblo un facilidad moderno y multifuncional pero cu lo ta dedica exclusivamente na deporte. Biniendo bek riba Carnival Village, Minister de Meza a comenta cu "e ta sigur algo sumamente grandi." El a bisa esey prome cu el a pasa brevemente den e historia rico di Carnaval su nacemento na San Nicolas recordando con hopi decada atras inmigrantenan a cuminsa cu loke awendia nos conoce como Jouvert Morning. "E tabata bay for di Bachelor's Quarter pa Village," Minister a bisa. Ta e historia rico aki, banda di e origen y desaroyo di Carnaval ta bay keda ilustra den e Carnival Museum cu tambe ta canando su curso y pronto lo cuminsa cu e trabounan na e sede cu ta na ex Green Hill Supermarket na San Nicolas.